

Spetando 'l fumo 1 - Pirola 2019

Vardando 'l fumo drio al vento

Lassè che diga do parole

Co on fia de sentimento

Fin che 'l va par onde 'l vòle!

Finalmente riva le votasion!

Marciapiè, se spera, e strade

trovarà 'na sistemassion,

so le stradele de le contrade

se metarà qualche tacon

dove pi le xè masenade,

poco caltrame e tanto sabion,

pa qualche mese le xè sistemade!

Viva viva le votasion!

Viva viva le votasion

Se prometarà laori novi

Robe strane e idee bone

Ma... se scheli no te trovi

Xè on specieto pa i soliti mone!

Bancheti in piassa no ghi n'è

Desso conta solo internet:

No se parla, chissà parcossa

Confrontarse no se possa!

Chi ga idee le tien par sé.

Nissun canta bandiera rossa

Se no i lo cassa dentro la fossa!

Co sta moda passegiera

Qualcun canta faccetta nera!

Andando vanti de sto passo

Che no riva Beppi del giasso!

Quelo si che 'l fa paura

No quei co la pele scura!

Co se sta ben no se se cura

E tuti st'altri?... in malora!

Ma chi comanda sta de sora

E ben misura la nostra ora!

Co la bilanza de la carità

E no co i scheli che se ga!

No serve maghi né profeti

Pa capir dove semo dirèti.

No vedo rivar na rivoluzion,

ma pitosto un rebalton:

che mete in berta i povareti
ingrassando i soliti driti!
Grassie a i cinque spiritai
che pa 'l naso vien menai
e no li se incorze gnanca on poco
che 'l se li mena via co l'oco!
Ormai no xè on mistero
che politica xè el so mestiero
e che poco el sta a badare
a chi po' ga da pagare!
Tosi zovani, pieni de vita!
Spaca tuto a sanca e a drita
Tanto el conto va a so pare!
Se 'l ga bessi par pagare!
Parchè 'ste musiche sia finie,
vanti femene co le litanie!

TANIE

Spetando 'l fumo 2 - Pirola 2019

Co i disastri rivà 'st'ano
no saria belo lamentarse oncora,
avendose scapolà ogni dano!

Ringrassiamo de aver scanpà malora
el nostro Signore grando e passiente
che ne dassa liberi de far tante monade
come se al mondo tuto fusse gnente!

Ne tira la recia e fa on poco male
parchè se capissa che 'sto ambiente
no 'l xè de nissun, ma in prestio a tuti
e bisogna rancurarlo o semo bauchi!

Chi da parte Padova vien in paese
Ga da vardar solo a parte drita:
tuto sistemà da qualche mese
al contrario da la parte sanca
dove ogni cura ghe manca.

No parlemo de rivar da Treviso,
un disastro, un pugno so 'l viso.

Eco i 4 de l'Ave Maria:

Salvini co Di Maio e Conte

Che se diverte zogando Tria.

E se Genova speta el ponte

Pa liberarse da i bordeli

No la fassa conto so Tonineli.

Cussì a Venessia no sarà finia

Del Mose l'infinita sinfonia.

Po la gran pedemontana

La 'ndarà anca pì lontana.

Par l'indipendensa e l'autonomia

Popolo veneto, metetela via!

Par gratarne on fià la panza

Eco el redito de citadinanza:

cossa e come nissun lo sa,

gnanca chi che lo ga inventà.

Par seguro alzarà le spese

Cavando scheli a le inprese.

Se pur xè voda ormai la sporta,

Prima de farla se taja la torta

Tuto in conto a generassion future

Drio st'altri debiti questi pure!

Ne la Roca a sud, el muro

Ormai da ani va ramengo

Dopo secoli che 'l tien duro,

ghe voria on bon ramendo,

no on laoro sol postisso

co quatro plastiche sbrindolade

ma che sia fato giusto e fisso

pa 'l decoro de Noale!
Sensa darghe pì on dessora,
quela vergogna colossale
de sistemar saria ora,
quela che parte da le banche
e par Treviso porta fora.
Salti, buse, erbasse a branche
Co boteghe che se la tira
Ma so 'l sporco le se rigira:
Poche ciacole, siori cari,
netè fora 'sti leamari!
Vegnemo desso a 'sto fumo
Che se alsa da quel grumo
E co 'n fià de bona pasiensa
Tiraremo 'na giusta sentensa!
ogni augurio sarà senpre bon,
se gavaremo fede nel Paron:
se i auguri diventa preghiera
la speranza pol esser vera!

Noale, 26/12/18

Dino Libralato

BORGIO CANPOSANPIERO 2019

Par un saludo caldo e sincero

Ecco el Borgo par Canposanpiero!

Anca se no semo proprio contenti

Lassemo da parte i nostri lamenti

Rengrassiamo allora sindaco e assessori

de aver messo in piè pochi lavori

parchè questa xè na gran cortesia

lassarghene a i novi 'na longa fila.

Co buse e pissine senza fin,

sparagnemo i scheli de l'aqua gin!

Beati chi se springa o se bagna!

e no cade che li se lagna!

Che li se ricorda de l'ultimo istà:

quanto arso che ghemo passà!

Grassie pa 'l consorzio: Sile e Dese

no ghe bada a far tante spese

pa sistemar ste carobere

che ofende l'entrata al paese.

Queste xe idee bone e vere!

Grassie anca par i scoli e canali

tegnui bastanza neti e desbratai

che, se anca la zente fusse sana,

ne salvaria da ogni brentana!

Se sa che l'aqua fa livelo

e no ama rosta o ponteselo!

Che trafeo so 'a nostra strada!

la voria on fia slargada!

Benedeti San Dono e Sene

tirème fòra da 'ste pene!
Parchè i ne fassa na rotonda
se votemo a santa cunegonda!
Par la strada de Capeleta
ghe pensarà santa Margareta.
A traversar 'sta provinciale
ghe xè proprio da farse male!
Ghemo fede in san Gaetano
che ne libera da ogni dano.
Pa intercession de santa Rita
se trovemo ancora in vita!

Simisi verdi grisi e bruti
ga dessipà i nostri fruti:
co quela scianta che me resta
ghe xè poco da far festa.
Desso a dire proprio el vero
finiremo ai frati de Canposanpiero
a pregar Sant'Antonio Abate
che vegna mejo st'altre anate.

Via da la testa ogni pensiero!
Che ogni peso diventa liziero!
Viva contento el bianco e 'l nero!
Ve augura el borgo Canposanpiero!

Noale, 06/12/18

Dino Libralato

2019 LAMENTO BORGO MESTRE

Co 'sta calupa e 'sté brunèste

Eco qua el Borgo Mèstre!
Pièni de grinta e de corajo
Oncora reclamémo el sotopasajo!
Del fondo iniziale persi xé i schèli:
e par trovarghene de alternativ
cognaria aver de i mejo sarvèli....
pì no ve credémo.... gran lavativi!
Dessipà me gavì i loghi pì bèli.
No resta posto dove stare in pase!
Fin che 'l popolo senpre tase!
In dispresso de tuti, santo cielo
i palassinari se inpise 'l buelo,
par noialtri, sporchessi a no finire
lassandome gratis a preminìre!
Parchè oncora mejo le passasse
gavì largà la strada pa' le scoasse,
e par noialtri a vegner in paese
strada streta tra canale e sièse!
Ricordève: so questo mèsurèmo
chi a governar Noal siéliarémo!
Stemo a vedar come e quando
se sistema l'area dove jèra Lando:
Sarà on poco slargà via Roncato
O lassemo specular el privato?

Ghe saria tante robe brute e bèle,
lamenti, da dir, storie e cavatèle,
però me prème tanto farve i auguri
par 'sti ani e par quei futuri
passeve dei zorni manco duri!
Mali e desgrassie staga distanti!
De pase tanta e de amor 'na sporta
Basi e sorisi veri a tuti quanti!
che 'l domile-disnove desso ve porta!
Versi porte, spalanchè le finestre
RIVA I AUGURI DE BORGO MESTRE!!!!

15/12/19 Noale

Dino Libralato

BORGO MIRAN LAMENTO 2019

Questo saria 'l Borgo de parte Miran
Pien de grinta e preoccupà pa 'l diman
No semo proprio par gnente contenti
De 'sti nostri governanti:
che a muso duro o oci soridenti
vorìa inbaucarme tuti quanti!
Tuta ciacola, i pretende comandar,
ma casini e dani solo boni a far
insustandose co fa dei marassi
verso quelli che ghe conta i passi!

Santo Iddio sparagnème altre prove,
fenissa presto 'sto domiledisnove
che gavemo snisià co bruti sesti!
Fa che le desgrassie no vegna a sésti!
Taramoti e cicloni, slavine e brentane
Che par senpre ne staga lontane!
Visto che la proposta de l'ano passà
la xè stà capia, ma solo par metà,
no saria da finir 'sto meso laoro
da via de i Tigli a via Coppadoro?
par via Roncato e via' Sant'Andrea
liberando dal trafego ogni stradela???
Co la finanziaria pena aprovà
El Comune pol spendar a piena branca
pure se la cassa soldi no ghi n'a
Che 'l spenda pure a destra e a manca!
Chi po' ghe toca dopo se rangiarà!
Ma vanti senpre co sto mondo mato,
tanto, noialtri 'o ghemo trovà fato!
Strucandose forte co cuore sincero
se femo i auguri per l'ano intiero!!!
Stemo unii, pronti senpre a darse 'na man,
xè questa la speranza del Borgo Miran!

24/12/19 Noale

Dino Libralato

Siccome di solito la manifestazione partiva con l'arrivo della Sacra Famiglia a bordo della chiatte che arrivava sulla fossa della Rocca, visto che quest'anno per motivi di sicurezza si è dovuto rinunciare, ecco pronto il

Comunicato stampa agli spettatori:

Co 'l decreto sicuressa

No riva pì on Cristo

So 'sta fossa

Pa' ordine del ministro

Via se marcia la Sacra Fameja

E no stè farve maraveja

Se 'l Bocia co Bepi e la Sposa

Par l'Egito 'l se intròsa!

Noale, 31/12/18

Dino Libralato

PRONOSTEGO PAR L'ANO 2019

OVEST-NORD BENE: *(che 'sto domilenove portasse del ben co poche prove)*

Co 'l fumo se gira parte de Istrana,

pare che 'l segna na stajon propio sana.

2019

Formento, polenta e vin ciaro

vedeli in stala e galine so 'l punaro.